



BOSNIA AND HERZEGOVINA
Ministry for Human Rights and Refugees

Broj: UP-I-05-07-7-25-2/19
Sarajevo, 26. 07. 2019. godine

Na osnovu člana 61. stav (2) Zakona o upravi ("Službeni glasnik BiH" br. 32/02, 102/09 i 72/17), člana 14. stav (2) Zakona o slobodi pristupa informacijama u Bosni i Hercegovini ("Službeni glasnik BiH" br. 28/00, 45/06, 102/09, 62/11 i 100/13), rješavajući po zahtjevu za pristup informacijama Nedima Begovića, ministrica za ljudska prava i izbjeglice, donosi

RJEŠENJE

1. Odobrava se pristup informacijama Nedimu Begoviću.
2. Informacija iz tačke 1. ovog rješenja dostavlja se podnositelju zahtjeva uz ovo rješenje.
3. Rješenje stupa na snagu danom donošenja.

Obrazloženje

Službenik za informiranje Ministarstva za ljudska prava i izbjeglice Bosne i Hercegovine je zaprimio zahtjev za pristup informacijama Nedima Begovića u kome se traži dostavljanje određenih podataka u vezi stanja vjerskih sloboda i odnosa države i vjerskih zajednica, kao iz zahtjeva.

Rad Ministarstva za ljudska prava i izbjeglice Bosne i Hercegovine je javan, te Ministarstvo po zahtjevima za pristup informacijama s kojima raspolaže postupa u skladu sa Zakonu o slobodi pristupa informacijama u Bosni i Hercegovini i Vodiču za pristup informacijama u Ministarstvu za ljudska prava i izbjeglice Bosne i Hercegovine. U tom smislu Ministarstvo svakoj fizičkoj i pravnoj osobi omogućava pristup informacijama koje su pod kontrolom Ministarstva.

Postupajući po članu 14. st. (1) i (2) Zakona o slobodi pristupa informacijama u Bosni i Hercegovini utvrđeno je kako se može odobriti pristup traženim informacijama.

Na osnovu gore navedenog odlučeno je kao u izreci rješenja.

Pouka o pravnom lijeku:

Protiv ovog rješenja može se izjaviti žalba Žalbenom vijeću pri Vijeću ministara BiH u roku od 15 dana od dana prijema rješenja.



Prilog:

- Informacija broj: UP-I-05-07-7-25-3/19 od 26.07.2019. godine

Dostavljeno:

- Nedim Begović, Fakultet islamskih nauka, ul. Ćemerlina 54, 71000 Sarajevo,
- a/a.



BOSNIA AND HERZEGOVINA

Ministry for Human Rights and Refugees

Broj: UP-I-05-07-7-25-3/19
Sarajevo, 26. 07. 2019. godine

Nedim Begović
Fakultet islamskih nauka
Ćemerlina 54
71 000 Sarajevo

PREDMET: Informacija, *dostavlja se,*-

Obratili ste se Ministarstvu za ljudska prava i izbjeglice Bosne i Hercegovine zahtjevom za pristup informacijama u kome se traži dostavljanje određenih podataka u vezi stanja vjerskih sloboda i odnosa države i vjerskih zajednica, kao iz zahtjeva.

U vezi sa vašim zahtjevom, dostavljamo vam informaciju kako slijedi:

I

U protekle četiri kalendarske godine Ministarstvo za ljudska prava i izbjeglice Bosne i Hercegovine nije zaprimilo nijedanu prijavu vezani za direktno ograničavanje i povredu prava na slobodu vjere ili uvjerenja.

Indirektno, je bilo par zahtjeva za tumačenje određenih pravnih pitanja iz Zakona o slobodi vjere i pravnom položaju crkava i vjerskih zajednica u Bosni i Hercegovini. Naprimjer zahtjev Medžlisa Islamske zajednice u Mostaru oko imovinskih pitanja za objekte u vlasništvu Islamske zajednice, zatim zastupničko pitanje postavljeno na 27. redovnoj sjednici Zastupničkog doma Parlamenta Federacije Bosne i Hercegovine, zastupnika Borisa Brauna održane 19.06 2018. godine, a koje se odnosi na vraćanje zemljišta Katoličkoj crkvi u Drvaru. Prije odgovora na ovo zastupničko pitanje Ministarstvo je zatražilo i dobilo izjašnjenje Načelnika opštine Drvar, prema kojem je o dat odgovor zastupniku.

Pored toga se indirektno mogu smatrati, povrede slobode vjere i uvjerenja i napadi na vjerske službenike, vjerske objekte i groblja, koji su bili evidentirani u proteklom periodu (Visoko, Sarajevo, Nevesinje, Trebinje, Banja Luka i dr.).

Pored značajnih aktivnosti koje država preduzima na ostvarivanju i zaštiti vjerskih sloboda, prisutne su, u smanjenom obimu, zloupotrebe i diskriminacija na osnovu vjerske pripadnosti, naročito u dijelovima zemlje u kojima je jedan narod vjerska manjina.

Slučajevi napada na vjerske objekte, sknavljenje grobova i grobalja, napadi i uvrede vjerskih službenika, napadi na vjerske simbole, omalovažavanje ili izrugivanje bilo kojoj vjeri i dalje su prisutni, ali su značajno smanjeni. Nadležne institucije preduzimaju mjere na ispitivanju slučajeva kršenja vjerskih sloboda i pronalaženju počinitelaca. Dosadašnji rezultati u otkrivanju počinitelaca nisu dovoljno efikasni da bi osigurali mirno uživanje vjerskih sloboda koje su zagarantirane Ustavom i pozitivnim zakonskim propisima Bosne i Hercegovine.

Takodje, Ministarstvo za ljudska prava i izbjeglice Bosne i Hercegovine se oglasilo i povodom nelegalnog rada paradžemata u Bosni i Hercegovini, gdje je zajedno sa Ministarstvom sigurnosti

Bosne i Hercegovine, Ministarstvom pravde Bosne i Hercegovine i Islamskom zajednicom u Bosni i Hercegovini, osudilo rad takvih nelegalnih zajednica i insistiralo da se problemi rješavaju unutar institucija Islamske zajednice u Bosni i Hercegovini uz pravnu pomoć navedenih državnih ministarstava, što je na kraju rezultiralo značajnim smanjenjem ovih paradjemata uz insistiranje da se svi stave pod okrilje Islamske zajednice u Bosni i Hercegovini.

Bitno je istaći i da je ovo Ministarstvo kao i Medjureligijsko vijeće u Bosni i Hercegovini uvijek reagovalo na sve negativne pojave iz oblasti slobode vjere i uvjerenja i redovno osuđivalo pojave usmjerene na ograničenje prava i povredu osjećaja vjernika u Bosni i Hercegovini.

II

U cilju daljeg afirmisanja rada crkava i vjerskih zajednica Ministarstvo za ljudska prava i izbjeglice Bosne i Hercegovine je iz budžeta za 2016. godinu izdvojilo 70.000,00 KM i dodijelilo putem Javnog oglasa crkvama i vjerskim zajednicama (sedam korisnika), za realizaciju projekata iz oblasti za koje su formirane.

Sredstva iz granta su dodijeljena u skladu sa Odlukom o kriterijima za dodjelu grant sredstava crkvama i vjerskim zajednicama u Bosni i Hercegovini za 2016. godinu (u prilogu dostavljamo tekst Odluke).

Na Javni poziv za dodjelu ovih sredstava mogle su se prijaviti sve crkve i vjerske zajednice koje su registrovane u Bosni i Hercegovini odnosno upisane u Registar crkava i vjerskih zajednica u Bosni i Hercegovini, kod Ministarstva pravde Bosne i Hercegovine.

Od prispjelih 35 prijava utvrđeno je da 26 prijava ne sadrže obaveznu dokumentaciju traženu Javnim pozivom, te se odbacene kao nepotpune, a od 9 potpunih prijava 7 je dobilo grant sredstva, prema Odluci, Vijeća ministara Bosne i Hercegovine sa 87. sjednice održane 29.12.2016. godine o dodjeli grant sredstava crkvama i vjerski zajednicama za 2016. godinu shodno dobijenim bodovima i kvalitetu aplikacije i to:

1. Medžlis islamske zajednice Srebrenik	10.000,00
2. CO Čajinče	10.000,00
3. Mitropolija dabrobosanska Sokolac	10.000,00
4. Jevrejska opština Sarajevo	9.990,00
5. PCM sv Petar sarajevski, Istočno Novo Sarajevo	10.000,00
6. Medijski centar Vrhbosanske nadbiskupije, Sarajevo	10.000,00
7. Medžlis Islamske zajednice Kiseljak	10.000,00

Dodjeljena finansijska sredstva su predviđena namjenski za potrebe crkava i vjerskih zajednica u BiH (Planirana Budžetom Ministarstva za ljudska prava i izbjeglice Bosne i Hercegovine za 2016. godinu).

U skladu s članom 8. Zakona o slobodi vjere, Bosna i Hercegovina je potvrdila kontinuitet svojstva pravnog lica Katoličkoj crkvi, Islamskoj zajednici u Bosni i Hercegovini, Srpskoj Pravoslavnoj Crkvi i Jevrejskoj zajednici Bosne i Hercegovine, kao i ostalima crkvama i vjerskim zajednicama kojima je priznato svojstvo pravnog lica i garantirala im pravo da slobodno uređuju vlastitu organizaciju uz puno poštivanje prava na slobodu savjesti i vjere.

Sva važnija pitanja ostvarivanja slobode vjere, a od interesa su za četiri tradicionalne crkve i vjerske zajednice, rješavaju se u konsultaciji s Međureligijskim vijećem Bosne i Hercegovine koje je formirano 1997. godine. **Vijeće ministara Bosne i Hercegovine i Međureligijsko vijeće Bosne i Hercegovine potpisali su 2008. godine Sporazum o međusobnoj saradnji** koji ima za cilj da podrži njegovu aktivnost u izgradnji međureligijskog dijaloga, vjerske tolerancije i suživota u Bosni i Hercegovini. Sporazumom je utvrđena i obaveza države da finansijski pomaže rad Međureligijskog vijeća Bosne i Hercegovine, što se u praksi već ostvaruje. Stim u vezi Ministarstvo za ljudska prava

i izbjeglice Bosne i Hercegovine finansira rad Medjureligijskog vijeća Bosne i Hercegovine u iznosu od **150.000,00 KM** grant sredstava na godišnjem nivou.

III

Nacrt Ugovora između Bosne i Hercegovine i Islamske zajednice u Bosni i Hercegovini je prihvaćen na sjednici Savjeta ministara Bosne i Hercegovine i od 20. 12. 2015. godine nalazi se na razmatranju na Predsjedništvu Bosne i Hercegovine.

U tom pravcu, bitno je istaći da Ustav Bosne i Hercegovine osigurava slobodu religije, a Zakon o slobodi vjere i pravnom položaju crkava i vjerskih zajednica koji je donesen 2004. godine garantuje vjerske slobode i jednakosti u pravima i obavezama svim crkvama i vjerskim zajednicama kao i njihovim vjernicima u Bosni i Hercegovini bez ikakve diskriminacije. Obzirom da su dosad zaključena dva osnovna ugovora (sa Svetom Stolicom i Srpskom Pravoslavnom Crkvom), a da je u toku usaglašavanje teksta Ugovor između Bosne i Hercegovine i Islamske zajednice u Bosni i Hercegovini koji je dobio saglasnost Vijeća ministara Bosne i Hercegovine, a od 20. decembra 2015. godine nalazi se na razmatranju u Predsjedništvu Bosne i Hercegovine, potrebno je da se i treći potpiše te da se na principima jednakopravnosti, istovremeno primjenjuju sva tri osnovna ugovora između Bosne i Hercegovine i Svete Stolice, Bosne i Hercegovine i Srpske Pravoslavne Crkve i Bosne i Hercegovine i Islamske zajednice u Bosni i Hercegovini.

Ministarstvo za ljudska prava i izbjeglice Bosne i Hercegovine - ministrica Semiha Borovac, su u protekle tri godine u više navrata koristili razne prilike za postavljanje pitanja i nudjenju pomoći oko usaglašavanja teksta ovog Ugovora, kako bi se zaključivanjem Osnovnog ugovora sa Islamskom zajednicom u Bosni i Hercegovini osigurao jedinstven pravni okvir u kojem će i crkve i vjerske zajednice u Bosni i Hercegovini djelovati i biti izjednačene u pravima i obavezama bez diskriminacije.

S ciljem rješavanja pitanja koja su od zajedničkog interesa za Bosnu i Hercegovinu i Katoličku crkvu, Predsjedništvo Bosne i Hercegovine je u augustu 2007. godine ratificiralo Osnovni ugovor između Bosne i Hercegovine i Svete Stolice i Dodatni protokol uz Osnovni ugovor.

Osim priznavanja javnopravnog subjektiviteta, Ugovorom se Katoličkoj crkvi daje više prava koje treba regulirati posebnim zakonima i ugovorima: Ugovorom o dušobrižništvu katolika vjernika pripadnika Oružanih snaga Bosne i Hercegovine, Zakonom o vjerskim praznicima, Zakonom o sigurnosti (nepovredivost mjesta za bogoštovlje i sigurnosnim mjerama u njima), Krivičnim zakonom (sudska istraga protiv crkvene osobe, nepovredivost ispovijedanja tajne), Zakonom o prostornom uređenju (izgradnja sakralnih objekata), te Zakonom o medijima (crkveni mediji i pristup javnim medijima).

Spomenuta i druga pitanja sadržana su u programu rada Mješovite komisije za praćenje provođenja Osnovnog ugovora između Bosne i Hercegovine i Svete Stolice i Dodatnog protokola uz Osnovni ugovor koja je konstituirana u decembru 2008. godine i radi u kontinuitetu do danas. U okviru Ministarstva za ljudska prava i izbjeglice Bosne i Hercegovine formiran je Stručni tim za podršku rada Komisije.

Komisija je, u okviru svoje nadležnosti, utvrdila prijedloge za pojedina naznačena pitanja i predložila ih nadležnim organima na daljnje rješavanje. Ugovor o dušobrižništvu za katolike vjernike, pripadnike Oružanih snaga Bosne i Hercegovine je usvojen i kao međunarodni ugovor, ratificiran. Zakon o vjerskim praznicima, sačinjen u saradnji s Međureligijskim vijećem u Bosni i Hercegovini, upućen je Parlamentarnoj skupštini Bosne i Hercegovine na razmatranje, predložene su izmjene Zakona o kazenoj politici i pokrenute inicijative za rješavanje drugih pitanja u okviru Zakona i Osnovnog ugovora.

U skladu sa Zakonom o slobodi vjere, u maju 2008. godine Predsjedništvo Bosne i Hercegovine ratificiralo je Osnovni ugovor između Bosne i Hercegovine i Srpske Pravoslavne Crkve.

Vijeće ministara BiH donijelo je u aprilu 2010. godine Odluku o osnivanju Mješovite komisije za provođenje Osnovnog ugovora između Bosne i Hercegovine i Srpske Pravoslavne Crkve.

Komisija nikad nije konstituisana jer nije bilo zainteresiranosti, a ni ličnih inicijativa za njenu aktivnost. Takođe, u decembru 2016. godine ponovo je sačinjen prijedlog Odluke o osnivanju Mješovite komisije za provođenje Osnovnog ugovora između Bosne i Hercegovine i Srpske Pravoslavne Crkve, koja nikad nije usvojena od starne Vijeća ministara Bosne i Hercegovine.

Obzirom personalne izmjene i u Srpskoj Pravoslavnoj Crkvi, a u narednom period i u Savjetu ministara Bosne i Hercegovine, predstoji nova aktivnost na imenovanju predstavnika obje strane i sačinjavanju nove Odluke o osnivanju Mješovite komisije.

Vežano za vaše pitanje o procjeni sprovođenja potpisanih ugovora, možemo konstatovati da nisu vidljivi značajniji pomoci obzirom da Mješovita komisija za provođenje Osnovnog ugovora između Bosne i Hercegovine i Srpske Pravoslavne Crkve nije nikad ni osvojena, da rad Mješovite komisije između Bosne i Hercegovine i Svete Stolice dosad nije rezultirao konkretnim aktivnostima odnosno završnim dokumentima, a naročito da još nije potpisan i Ugovor sa Islamskom Zajednicom u Bosni i Hercegovini.

Takođe, možemo konstatovati i činjenicu da, zbog gore navedenih razloga, nije došlo ni do usaglašavanja bilo kojih zakona ili drugih propisa sa odredbama potpisanih ugovora.

Ujedno vam se zahvaljujemo što nam dajete priznanje zbog usvajanja novog **Uputstva o primjeni Zakona o slobodi vjere i pravnom položaju crkava i vjerskih zajednica u Bosni i Hercegovini,** iz kojeg vidimo da ste jako zainteresovani za normativno regulisanje i nesmetano ostvarivanje svih prava u ovoj oblasti u Bosni i Hercegovini.

Vijeće ministara Bosne i Hercegovine na 102. sjednici, održanoj 25.6.2014. godine zadužilo je resorno ministarstvo da ranije Uputstvo uskladi sa odredbama Zakona o slobodi vjere i pravnom položaju crkava i vjerskih zajednica u Bosni i Hercegovini i pripremi prijedlog izmjena i dopuna Uputstva.

Resorno ministarstvo je na osnovu dosadašnjih iskustava u implementaciji ovog Zakona smatralo da je potrebno izraditi novo Uputstvo.

Prijedlogom teksta novog Uputstva daju se crkvama i vjerskim zajednicama i ostalim nadležnim organima preciznije uputa za provođenje Zakona o slobodi vjere i pravnom položaju crkava i vjerskih zajednica u Bosni i Hercegovini i na taj način unapređuje sardanja, poboljšava promovisanje tolerancije i suživota čime se omogućava bolje poštivanje prava na slobodu savjesti i vjere.

Novo Uputstvo o provodjenju Zakona o slobodi vjere i pravnom položaju crkava i vjerskih zajednica u Bosni i Hercegovini, ministrica je donijela u decembru 2018. godine pod brojem: 01-02-2-1-2/18, a objavljeno je u „Službenom glasniku BiH“, broj: 28/19.

Takođe, Vas obavještavamo da će u drugoj polovini 2019. godine Ministarstvo za ljudska prava i izbjeglice BiH, organizovati sastanak ili okrugli sto na kome ćemo zajedno sa vama i nadležnim institucijama, razgovarati o primjeni novog Uputstva, kreiranju obrazaca iz člana 4 – zahtjev za mišljenje i člana 5 - obrazac upita/predstavke kao i o obavezama iz člana 7 stav 1. Uputstva koji glasi:

„ U svrhu adekvatnog ostvarivanja prava u skladu sa članom 13. Zakona koja se odnose na penzijsko, invalidsko i zdravstveno osiguranje vjerskih službenika, Ministarstvo za ljudska prava i izbjeglice će u roku od 9 mjeseci po usvajanju ovog Uputstva u saradnji sa nadležnim institucijama za ovu oblast i predstavnicima crkava i vjerskih zajednica sačiniti i podnijeti inicijativu sa konkretnim prijedlozima

za rješavanja ovog pitanja i istu uputiti na postupanje prema nadležnim nivoima vlasti u u Bosni i Hercegovini.”

S poštovanjem,



MINISTRICA
Semiha Borovac

Semiha Borovac

Prilog:

- Odluka o kriterijima za dodjelu grant sredstava crkvama i vjerskim zajednicama u Bosni i Hercegovini za 2016. godinu

Na osnovu člana 10. stav (2) Zakona o Budžetu institucija Bosne i Hercegovine i međunarodnih obaveza Bosne i Hercegovine za 2016. godinu („Službeni glasnik BiH“, broj 101/15) i člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), Vijeće ministara Bosne i Hercegovine na 65. sjednici, održanoj 21.07.2016. godine, donijelo je

ODLUKU

o kriterijima za dodjelu grant sredstava crkvama i vjerskim zajednicama u Bosni i Hercegovini za 2016. godinu

Član 1. (Predmet odluke)

(1) Ovom Odlukom utvrđuju se kriteriji, postupak i način dodjele grant sredstava crkvama i vjerskim zajednicama u Bosni i Hercegovini za 2016. godinu, u visini od **70.000,00 KM** koja su tekućim grantom u okviru budžeta Ministarstva za ljudska prava i izbjeglice Bosne i Hercegovine (u daljem tekstu Ministarstvo) namijenjena crkvama i vjerskim zajednicama u Bosni i Hercegovini za 2016. godinu.

(2) Prema članu 14. stav 1. tačka 4. Zakona o slobodi vjere i pravnom položaju crkava i vjerskih zajednica u BiH („Službeni glasnik BiH“, broj 5/04) država može na osnovu jednakosti prema svima, davati materijalnu podršku crkvama i vjerskim zajednicama za očuvanje kulturne i historijske baštine, zdravstvene djelatnosti, obrazovne, karitativne i socijalne usluge koje pružaju crkve i vjerske zajednice jedino pod uslovom da crkve i vjerske zajednice spomenute usluge obavljaju bez ikakve diskriminacije, a posebno nediskriminacije na osnovu vjere ili uvjerenja.

Član 2. (Sredstva)

U okviru redovnog budžeta za 2016. godinu Ministarstva, osigurana su grant sredstva crkvama i vjerskim zajednicama u Bosni i Hercegovini u iznosu od **70.000,00 KM**.

Član 3. (Javni poziv)

(1) Pravo na podnošenje projektnih prijedloga na osnovu objavljenog Javnog poziva imaju sve crkve i vjerske zajednice koje su registrovane u Ministarstvu pravde Bosne i Hercegovine.

(2) Ukoliko subjekti iz stava (1) ovog člana apliciraju sa više projekata, sredstva mogu biti dodijeljena samo za jedan projekat u okviru jednog granta na osnovu rang liste.

Član 4.
(Namjena sredstava)

Odobrena sredstva namijenjena crkvama i vjerskim zajednicama u Bosni i Hercegovini za 2016. godinu mogu se koristiti za sljedeće projekte:

- a) jačanje vjerskih sloboda i međureligijske tolerancije,
- b) očuvanje kulturne i historijske baštine,
- c) podrška karitativnim i socijalnim uslugama koje pružaju crkve i vjerske zajednice,

Član 5.
(Raspodjela sredstava)

(1) Sredstva se dodjeljuju crkvama i vjerskim zajednicama (u daljem tekstu: korisnici sredstava) putem Javnog poziva za prikupljanje projektnih prijedloga za dodjelu grant sredstava crkvama i vjerskim zajednicama u Bosni i Hercegovini za 2016. godinu i u skladu sa kriterijima definisanim ovom Odlukom.

(2) Maksimalni iznos koji se odobrava iz raspoloživih budžetskih sredstava može iznositi do **10.000,00 KM** za **sedam** projektnih prijedloga crkava i vjerskih zajednica.

(3) Korisnici sredstava prilikom podnošenja projektnog prijedloga mogu:

- a) učestvovati sa vlastitim sredstvima
- b) vlastita sredstva udružiti sa partnerima i ista moraju biti prikazana u projektnom prijedlogu.

Član 6.
(Troškovi projekta)

(1) Ukupna vrijednost administrativnih troškova projekta ne može prelaziti 10% od ukupnog traženog iznosa za projekt, a u zavisnosti od namjene grant sredstava.

(2) U budžetu projekta, Obrazacu III koji je sastavni dio ove Odluke, mora biti jasno naznačeno za koje aktivnosti se traži finansiranje od strane Ministarstva, a koje aktivnosti će biti finansirane vlastitim sredstvima ili sredstvima iz drugih izvora.

Član 7.
(Postupak i način dodjele sredstava)

(1) Ministarstvo će po stupanju na snagu ove Odluke, na svojoj internet stranici www.mhrr.gov.ba putem Javnog poziva objaviti postupak i način dodjele grant sredstava crkvama i vjerskim zajednicama u Bosni i Hercegovini za 2016. godinu.

(2) Obavijest o objavi Javnog poziva objaviti će se u tri dnevna lista u Bosni i Hercegovini.

(3) Postupak i način dodjele grant sredstava će se vršiti u skladu sa ovom Odlukom.

(4) Nositelj ukupne realizacije i koordinator Projekta u Ministarstvu je Sektor za ljudska prava.

Član 8.
(Način podnošenja projektnih prijedloga)

Projekti se dostavljaju isključivo putem pošte na adresu Ministarstva, Trg BiH 1, 71000 Sarajevo u zatvorenim kovertama, sa naznakom za Komisiju za odabir projekata iz grant sredstava crkvama i vjerskim zajednicama u Bosni i Hercegovini za 2016. godinu. Projekte dostaviti ISKLJUČIVO NA OBRASCU PROJEKTOG PRIJEDLOGA koji se može preuzeti u prostorijama Ministarstva i dostupan je na stranici www.mhrr.gov.ba

Član 9.
(Kriteriji za vrednovanje projektnih prijedloga)

(1) Prilikom razmatranja projektnih prijedloga vrednovati će se sljedeće:

a) Relevantnost projekta

- 1) Da je projekt relevantan u odnosu na namjenu grant sredstava.....**do 10 bodova**
- 2) Da li projekt rezultira osnaživanjem postavljenih ciljeva..... **do 10 bodova**
- 3) Da li projekt rezultira aktivnijim angažmanom vjernika **do 10 bodova**

b) Kvalitet i logika projekta

- 1) Da li je projekat jasan, logičan i omogućava ostvarivanje očekivanih rezultata..**do 5 bodova**
- 2) Da li je plan aktivnosti izvodljiv i logičan.....**do 5 bodova**
- 3) Da li su indikatori praćenja dobro definirani (mjerljivi i kvantificirani) i logički povezani sa očekivanim rezultatima i ishodima **do 5 bodova**

c) Budžet projekta

- 1) Da li je predloženi budžet realan, jasan i povezan s očekivanim rezultatima.....**do 5 bodova**
- 2) Da li budžet sadrži narativna pojašnjenja u svrhu provjere realnosti budžeta....**do 5 bodova**

d) Administrativni i finansijski kapaciteti podnosioca prijave

- 1) Administrativni kapaciteti podnosioca prijave (*odgovarajuća organizaciona struktura koja omogućava kvalitetno i efikasno upravljanje projektom, ekspertiza, prethodno iskustvo u upravljanju projektima*).....**do 5 bodova**
- 2) Finansijski kapaciteti podnosioca prijave (*ukupni izvori finansiranja temeljem kojih se usklađuje rezultat poslovanja veći od traženog iznosa za realizovanje projekta*)..... **do 5 bodova**

e) Dodatni kriteriji

- 1) Da li je projekat jasno povezan sa djelatnošću crkava i vjerskih zajednica**do 5 bodova**
- 2) Učešće u sufinansiranju ili sufinansiranje od strane implementatora.....**do 5 bodova**

f) Održivost projekta

Da li je projekat održiv u smislu funkcioniranja, upravljanja i daljnjeg finansiranja aktivnosti i nakon završetka projektado **5 bodova**

(2) Maksimalan broj bodova nakon izvršenog vrednovanja projektnog prijedloga može iznositi80 bodova.

Član 10. (Sadržaj projektne dokumentacije)

(1) Podnositelj projektnog prijedloga za dodjelu grant sredstava obavezan je dostaviti sljedeću dokumentaciju i obrasce koji su sastavni dio ove Odluke:

- a) Obrazac projektnog prijedloga - *Obrazac I*;
- b) Plan aktivnosti - *Obrazac II*;
- c) Budžet projekta - *Obrazac III*;
- d) Logički okvir - *Obrazac IV*;
- e) Podaci o podnosiocu projektnog prijedloga - *Obrazac V*;
- f) Uvjerenje o poreskoj registraciji i ID broj (*ovjerene kopije*);
- g) Ugovor s bankom o otvaranju transakcionog računa (*ovjerena kopija*);
- h) Izvod iz Registra o upisu crkava i vjerskih zajednica ne stariji od 3 mjeseca, odnosno uvjerenje ili potvrda, Ministarstva pravde BiH.

(2) U budžetu projekta mora biti jasno naznačeno za koje aktivnosti se traže sredstva od strane Ministarstva, a za koje aktivnosti su osigurana sredstva iz drugih izvora, ukoliko postoje.

(3) Svi Obrasci moraju biti popunjeni, potpisani i ovjereni od strane odgovorne osobe podnosioca prijave.

Član 11. (Komisija za odabir korisnika grant sredstava crkvama i vjerskim zajednicama u Bosni i Hercegovini za 2016. godinu)

(1) Ministrica za ljudska prava i izbjeglice BiH će posebnom Odlukom imenovati članove Komisije za odabir projekata utroška grant sredstava – crkvama i vjerskim zajednicama u Bosni i Hercegovini za 2016. godinu (u daljem tekstu Komisija).

(2) Komisija kao privremeno tijelo se sastoji od 5 (pet) članova i sekretara Komisije bez prava odlučivanja.

(3) Osnovni zadatak Komisije je da izvrši evaluaciju i vrednovanje pristiglih projektnih prijedloga, te sačini rang listu projektnih prijedloga/korisnika sa prijedlogom odluke o dodjeli grant sredstava.

(4) Ostali zadaci, način rada i odlučivanja, prava i obaveze članova Komisije će se regulisati Poslovnikom o radu Komisije.

(5) Konačan izvještaj o radu Komisije će se dostaviti Ministrici za ljudska prava i izbjeglice BiH nakon donošenja Odluke Vijeća ministara BiH o dodjeli grant sredstava.

Član 12.
(Odluka o dodjeli grant sredstava)

Odluku o dodjeli grant sredstava na prijedlog Ministarstva donosi Vijeće ministara Bosne i Hercegovine i ista će se objaviti na web stranici Ministarstva.

Član 13.
(Obavijest o rezultatima)

Obavijest o rezultatima odabira projektnih prijedloga kao i obavijesti o eventualnom odbacivanju ili odbijanju projektnih prijedloga će se dostaviti svim podnosiocima prijave.

Član 14.
(Ugovor o dodjeli grant sredstava)

(1) Na osnovu Odluke iz člana 11. Ministarstvo zaključuje Ugovor o dodjeli grant sredstava sa svakim korisnikom granta, kojim će se definisati uslovi, svrha, način korištenja sredstava, izvještavanje, odgovornosti ugovorenih strana i druga pitanja važna za implementaciju projekata.

(2) Prije potpisivanja ugovora, odabrani korisnici grant sredstava su dužni Ministarstvu dostaviti popunjenu i ovjerenu bjanko mjenicu bez protesta sa mjeničnom izjavom na iznos granta.

(3) Ukoliko korisnik sredstava ne prihvati uslove propisane ugovorom iz stava (1) i (2) ovog člana, gubi pravo na korištenje grant sredstava i ista će biti dodijeljena narednom aplikantu na rang listi.

Član 15.
(Način utroška dodijeljenih sredstava)

Crkve i vjerske zajednice, kojima su dodijeljena sredstva putem Javnog poziva odgovaraju za namjensko trošenje sredstava.

Član 16.
(Kontrola odobrenih projektnih prijedloga)

(1) Kontrola realizacije odobrenih projekata vršit će se na slijedeći način:

- a) u toku same realizacije projekta, prema ukazanoj potrebi, kako bi se utvrdilo trenutno stanje na terenu i zakonitost provođenja potrebnih postupaka;
- b) po završetku projekta na bazi dostavljenog kompletnog narativnog i finansijskog izvještaja;

(2) Kontrolu iz stava (1) ovog člana vrši Sektor za ljudska prava.

(3) U slučaju uočenih nepravilnosti Ministarstvo može formirati posebnu Komisiju koja će biti stručno vezana za konkretan predmet i izvršiti dodatnu kontrolu, te ukoliko zaključi da je potrebno Komisija može otići i u sjedište korisnika sredstava radi uvida u cjelokupnu dokumentaciju.

(4) Ukoliko se ustanovi nenamjensko trošenje doznačenih sredstava, ili u slučaju da se projekat ne može realizovati, ili ako se rok za realizaciju projekta neopravdano prekoračuje aplikant je dužan izvršiti povrat cjelokupnog iznosa doznačenih sredstava na Jedinstveni račun trezora Bosne i Hercegovine u roku od 30 dana od dana kada Ministarstvo pisanim putem to od njega zatraži, u suprotnom pokrenut će se postupak pred nadležnim organom, te se zabranjuje apliciranje istom na konkurse koje raspisuje Ministarstvo u periodu od tri godine.

Član 17. (Preostala sredstva)

(1) Ukoliko korisnik grant sredstava nije utrošio cjelokupna dodijeljena sredstva za realizaciju odobrenog projekta može ih naknadno utrošiti u skladu sa projektnim prijedlogom uz prethodno odobrenje Ministarstva, u protivnom je obavezan u roku od 10 dana od dana saznanja izvijestiti Ministarstvo o iznosu neutrošenih grant sredstava, kako bi dobio upute o načinu na koji će izvršiti povrat dijela grant sredstava.

(2) Korisnik grant sredstava je dužan u roku od 10 dana uplatiti preostala neutrošena grant sredstva prema uputama Ministarstva.

Član 18. (Izvještavanje)

(1) Korisnik sredstava dužan je voditi izdvojenu dokumentaciju o realizaciji projekta koji se finansira, a u slučaju potrebe, istu učini dostupnom za razmatranje i kontrolu od strane Ministarstva.

(2) Korisnik sredstava dužan je Ministarstvu dostaviti izvještaj o namjenskom utrošku sredstava na Obrascu VII za izvještavanje, koji je sastavno dio ove Odluke, najkasnije do 31.01.2017. godine za prethodnu godinu.

(3) Izvještaj će osigurati informacije o projektnim aktivnostima, postignućima i rezultatima, kao i o troškovima i relevantnim plaćanjima nastalim u toku provedbe, koji će biti potkrijepljeni odgovarajućom finansijskom dokumentacijom.

(4) Ministarstvo će nakon dostavljanja izvještaja i prateće dokumentacije izvršiti kontrolu realizacije i finansijski monitoring za svaki odobreni projekat iz granta.

(5) Ukoliko korisnik grant sredstava u propisanom roku ne dostavi izvještaj, Ministarstvo će pokrenuti postupak za povrat uplaćenih finansijskih sredstava.

Član 19.
(Odgovornost za realizaciju odluke)

Za realizaciju ove Odluke zadužuju se Ministarstvo za ljudska prava i izbjeglice Bosne i Hercegovine i Ministarstvo finansija i trezora Bosne i Hercegovine.

Član 20.
(Stupanje na snagu)

Ova odluka stupa na snagu danom donošenja i objavljuje se u „Službenom glasniku BiH“.

VM broj _____/16
21.07. 2016.godine
Sarajevo

PREDSJEDAVAJUĆI
VIJEĆA MINISTARA BIH

Dr. Denis Zvizdić

OBRAZLOŽENJE

I-PРАВNA OSNOVA

Pravna osnova za donošenje ove odluke sadržana je u članu 10. stav (2). Zakona o Budžetu institucija Bosne i Hercegovine i međunarodnih obaveza Bosne i Hercegovine za 2016.godinu („Službeni glasnik BiH“ broj 101/15) gdje je utvrđeno da će Vijeće ministara Bosne i Hercegovine posebnim odlukama propisati korištenje grantova čiji korisnici nisu unaprijed utvrđeni ovim zakonom.

Takođe, članom 17. Zakona o Vijeću ministara Bosne i Hercegovine („Službeni glasnik BiH“ br.90/03, 42/03, 81/06, 76/07, 94/07, i 24/08), predviđeno je da Vijeće ministara Bosne i Hercegovine donosi odluke u svrhu izvršenja svojih obaveza.

II-RAZLOZI ZA DONOŠENJE ODLUKE

Prema članu 14. stav 1. tačka 4. Zakona o slobodi vjere i pravnom položaju crkava i vjerskih zajednica u BiH („Službeni glasnik BiH“, broj 5/04) država može na osnovu jednakosti prema svima, davati materijalnu podršku crkvama i vjerskim zajednicama za očuvanje kulturne i historijske baštine, zdravstvene djelatnosti, obrazovne, karitativne i socijalne usluge koje pružaju crkve i vjerske zajednice jedino pod uslovom da crkve i vjerske zajednice spomenute usluge obavljaju bez ikakve diskriminacije, a posebno nediskriminacije na osnovu vjere ili uvjerenja.

Osnovni ciljevi utroška grant sredstava namjenjenih crkvama i vjerskim zajednicama u Bosni i Hercegovini za 2016.godinu su jačanje vjerskih sloboda i međureligijske tolerancije, očuvanje kulturne i historijske baštine, kao i davanje podrška karitativnim i socijalnim uslugama koje pružaju crkve i vjerske zajednice,

III-FINANSIRANJE

U okviru redovnog budžeta za 2016. godinu Ministarstva za ljudska prava i izbjeglice Bosne i Hercegovine osigurana su grant sredstva crkvama i vjerskim zajednicama u Bosni i Hercegovini u iznosu od **70.000,00 KM**.